

點校本二十四史修訂本

史記

七

中華書局

〔漢〕司馬遷 撰
〔宋〕裴駰 集解
〔唐〕司馬貞 索隱
〔唐〕張守節 正義

點校本
二十四史
修訂本

史記

第七冊
卷六一至卷八〇

中華書局

史記卷六十一

伯夷列傳第一

索隱列傳者，謂敘列人臣事跡，今可傳於後世，故曰列傳。

正義其人行跡可序列，故云

列傳。

夫學者載籍極博，猶考信於六藝。詩書雖缺，^{一一}然虞夏之文可知也。^{一二}堯將遜位，讓於虞舜，舜禹之間，岳牧咸薦，乃試之於位，典職數十年，^{一三}功用既興，然後授政，示天下重器，^{一四}王者大統，傳天下若斯之難也。而說者曰堯讓天下於許由，^{一五}許由不受，恥之，逃隱。及夏之時，有卞隨、務光者。此何以稱焉？^{一六}太史公曰：余登箕山，^{一七}其上蓋有許由冢云。孔子序列古之仁聖賢人，如吳太伯、伯夷之倫詳矣。余以所聞由、光二義至高，^{一九}其文辭不少概見，何哉？^{二〇}

一一索隱按：孔子系家稱古詩三千餘篇，孔子刪三百五篇爲詩，今亡五篇。又書緯稱孔子求得黃

帝玄孫帝魁之書，迄秦穆公，凡三千三百三十篇，乃刪以一百篇爲尚書，十八篇爲中候。今百篇之內見亡四十二篇，是詩書又有缺亡者也。

〔二〕索隱按：尚書有堯典、舜典、大禹謨，備言虞夏禪讓之事，故云「虞夏之文可知也」。

〔三〕正義舜禹皆典職事二十餘年，然後踐帝位。

〔四〕索隱言天下者是王者之重器，故莊子云「天下大器」是也。則大器亦重器也。

〔五〕正義皇甫謐高士傳云：「許由字武仲。堯聞，致天下而讓焉，乃退而遁於中嶽潁水之陽，箕山之下隱。堯又召爲九州長，由不欲聞之，洗耳於潁水濱。時有巢父牽犢欲飲之，見由洗耳，問其故。對曰：『堯欲召我爲九州長，惡聞其聲，是故洗耳。』巢父曰：『子若處高岸深谷，人道不通，誰能見子？子故浮游欲聞，求其名譽，污吾犢口。』牽犢上流飲之。許由歿，葬此山，亦名許由山。」在洛州陽城縣南十三里。

〔六〕索隱按：「說者」謂諸子雜記也。然堯讓於許由，及夏時有卞隨、務光等，殷湯讓之天下，並不受而逃，事具莊周讓王篇。正義經史唯稱伯夷、叔齊，不及許由、卞隨、務光者，不少概見，何以哉？故言「何以稱焉」，爲不稱說之也。

〔七〕索隱蓋楊惲、東方朔見其文稱「余」，而加「太史公曰」也。

〔八〕索隱謂太史公聞莊周所說許由、務光等。

〔九〕索隱謂堯讓天下於許由，由遂逃箕山，洗耳於潁水；卞隨自投於桐水；務光負石自沈於盧

水：是義至高。

〔一〇〕索隱按：概是梗概，謂略也。蓋以由、光義至高，而詩書之文辭遂不少梗概載見，何以如此哉？是太史公疑說者之言或非實也。正義概，古代反。

孔子曰：「伯夷、叔齊，不念舊惡，怨是用希。」「求仁得仁，又何怨乎？」余悲伯夷之意，睹軼詩可異焉。〔一〕其傳曰：

伯夷、叔齊，孤竹君之二子也。〔二〕父欲立叔齊，及父卒，叔齊讓伯夷。伯夷曰：「父命也。」遂逃去。叔齊亦不肯立而逃之。國人立其中子。於是伯夷、叔齊聞西伯昌善養老，盍往歸焉。〔三〕及至，西伯卒，武王載木主，號爲文王，東伐紂。伯夷、叔齊叩馬而諫曰：「父死不葬，爰及干戈，可謂孝乎？以臣弑君，可謂仁乎？」左右欲兵之。太公曰：「此義人也。」扶而去之。武王已平殷亂，天下宗周，而伯夷、叔齊恥之，義不食周粟，隱於首陽山，〔四〕采薇而食之。〔五〕及餓且死，作歌。其辭曰：「登彼西山兮，〔六〕采其薇矣。以暴易暴兮，不知其非矣。〔七〕神農、虞、夏忽焉沒兮，我安適歸矣？〔八〕于嗟徂兮，命之衰矣！」〔九〕遂餓死於首陽山。

由此觀之，怨邪非邪？〔一〇〕

〔一二〕索隱謂悲其兄弟相讓，又義不食周粟而餓死。睹音覩。軼音逸。謂見逸詩之文，即下采薇之

詩是也。不編入三百篇，故云逸詩也。可異焉者，按論語云「求仁得仁，又何怨乎」。今其詩云「我安適歸矣，于嗟徂兮，命之衰矣」。是怨詞也，故云可異焉。

〔二〕索隱按：「其傳」蓋韓詩外傳及呂氏春秋也。其傳云孤竹君，是殷湯三月丙寅日所封。相傳至夷、齊之父，名初，字子朝。伯夷名允，字公信。叔齊名致，字公達。解者云，夷、齊，謚也；伯、仲，又其長少之字。按：地理志孤竹城在遼西令支縣。應劭云伯夷之國也。其君姓墨胎氏。〔正義〕本前注「丙寅」作「殷湯正月三日丙寅」。括地志云：「孤竹古城在盧龍縣南十二里，殷時諸侯孤竹國也。」

〔三〕索隱劉氏云：「蓋者，疑辭。蓋謂其年老歸就西伯也。」

〔四〕集解馬融曰：「首陽山在河東蒲阪華山之北，河曲之中。」〔正義〕曹大家注幽通賦云：「夷、

齊餓於首陽山，在隴西首。」又戴延之西征記云：「洛陽東北首陽山有夷齊祠。」今在偃師縣西北。又孟子云：「夷、齊避紂，居北海之濱。」首陽山，說文云首陽山在遼西。史傳及諸書，夷、齊餓於首陽凡五所，各有案據，先後不詳。莊子云：「伯夷、叔齊西至岐陽，見周武王伐殷，曰：『吾聞古之士，遭治世不避其任，遇亂世不爲苟存。今天下聞周德衰，其並乎周以塗吾身也，不若避之以繫吾行。』」二子北至于首陽之山，遂飢餓而死。」又下詩「登彼西山」，是今清源縣首陽山，在岐陽西北，明即夷、齊餓死處也。

〔五〕索隱薇，蕨也。爾雅云：「蕨，鼈也。」〔正義〕陸璣毛詩草木疏云：「薇，山菜也。莖葉皆似小

豆，蔓生，其味亦如小豆藿，可作羹，亦可生食也。」

〔六〕索隱按：西山即首陽山也。

〔七〕索隱謂以武王之暴臣易股紂之暴主，而不自知其非矣。

〔八〕索隱言義、農、虞、夏敦樸禪讓之道，超忽久矣，終沒矣。今逢此君臣爭奪，故我安適歸矣。

〔九〕索隱于嗟，嗟嘆之辭也。徂者，往也，死也。言己今日餓死，亦是運命衰薄，不遇大道之時，至幽憂而餓死。

〔一〇〕索隱太史公言已觀此詩之情，夷、齊之行似是有所怨邪？又疑其云非是怨邪？

或曰：「天道無親，常與善人。」若伯夷、叔齊，可謂善人者非邪？一積仁絜行如此而餓死！且七十子之徒，仲尼獨薦顏淵爲好學。然回也屢空，糟糠不厭，三而卒蚤夭。天之報施善人，其何如哉？盜跖日殺不辜，二肝人之肉，四暴戾恣睢，五聚黨數千人橫行天下，竟以壽終。六是遵何德哉？七此其尤大彰明較著者也。八若至近世，操行不軌，專犯忌諱，而終身逸樂，九富厚累世不絕。或擇地而蹈之，二〇時然後出言，二一行不由徑，二三非公正不發憤，而遇禍災者，不可勝數也。三三余甚惑焉，儻所謂天道，是邪非邪？三四

〔一一〕索隱又敍論云若夷、齊之行如此，可謂善人者邪，又非善人者邪，亦疑也。

【二】索隱厭者，飫也，不厭謂不飽也。糟糠，貧者之所餐也，故曰「糟糠之妻」是也。然顏生簞食瓢飲（二），亦未見「糟糠」之文也。

【三】索隱「蹠」及注作「跖」，並音之石反。按：盜蹠，柳下惠之弟，亦見莊子，爲篇名。正義按：蹠者，黃帝時大盜之名。以柳下惠弟爲天下大盜，故世放古，號之盜蹠。

【四】索隱劉氏云「謂取人肉爲生肝」，非也。按：莊子云「跖方休卒太山之陽，膾人肝而鋪之」。

【五】索隱暴戾謂兇暴而惡戾也。鄒誕生恣音資，睢音千餘反。劉氏恣音如字，睢音休季反。恣睢謂恣行爲睢惡之貌也。正義睢，仰白目，怒貌也。言盜蹠兇暴，惡戾，恣性，怒白目也。

【六】集解皇覽曰：「盜跖冢在河東大陽，臨河曲，直弘農華陰縣潼鄉。」按：盜跖即柳下惠弟也。

索隱直音如字。直者，當也。或音值，非也。潼音同。按：潼，水名，因爲鄉，今之潼津關是，亦爲縣也。正義括地志云：「盜跖冢在陝州河北縣西二十里。河北縣本漢大陽縣也。」又

今齊州平陵縣有盜跖冢，未詳也。

【七】索隱言盜蹠無道，橫行天下，竟以壽終，是其人遵行何德而致此哉？

【八】索隱按：較，明也。言伯夷有德而餓死，盜蹠暴戾而壽終，是賢不遇而惡道長，尤大著明之證也。

【九】索隱謂若魯桓、楚靈、晉獻、齊襄之比皆是。

【一〇】索隱謂不仕暗君，不飲盜泉，裹足高山之頂，竄跡滄海之濱是也。正義謂北郭駱、鮑焦等

是也。

〔二〕索隱 按：論語「夫子時然後言」。

〔三〕索隱 按：論語澹臺滅明之行也。

〔三〕索隱 謂人臣之節，非公正之事不感激發憤。或出忠言，或致身命，而卒遇禍災者，不可勝數。謂龍逢、比干、屈平、伍胥之屬是也。

〔四〕索隱 太史公惑於不軌而逸樂，公正而遇災害，爲天道之非而又是邪？深感之也。蓋天道玄遠，聰聽暫遺，或窮通數會，不由行事，所以行善未必福，行惡未必禍，故先達皆猶昧之也。

〔正義〕儻音他蕩反。儻，未定之詞也。爲天道不敢的言是非，故云儻也。

子曰「道不同不相爲謀」，亦各從其志也。〔一〕故曰「富貴如可求，雖執鞭之士，吾亦爲之。〔二〕如不可求，從吾所好」。〔三〕「歲寒，然後知松柏之後凋」。〔四〕「舉世混濁，清士乃見。〔五〕豈以其重若彼，其輕若此哉？」〔六〕

〔一〕正義 太史公引孔子之言證前事也。言天道人道不同，一任其運遇，亦各從其志意也。

〔二〕集解 鄭玄曰：「富貴不可求而得之，當脩德以得之。若於道可求而得之者，雖執鞭賤職，我亦爲之。」

〔三〕集解 孔安國曰：「所好者古人之道。」

〔四〕集解何晏曰：「大寒之歲，衆木皆死，然後松柏少凋傷；平歲衆木亦有不死者，故須歲寒然後別之。喻凡人處治世，亦能自脩整，與君子同，在濁世然後知君子之正不苟容也。」

〔五〕索隱老子曰「國家昏亂，有忠臣〔三〕」，是舉代混濁，則士之清絜者乃彰見，故上文「歲寒然後知松柏之後彫」，先爲此言張本也。〔正義〕言天下混亂，清絜之士不撓，不苟合於盜跖也。

〔六〕索隱按：謂伯夷讓德之重若彼，而采薇餓死之輕若此。又一解云，操行不軌，富厚累代，是其重若彼；公正發憤而遇禍災，是其輕若此也。〔正義〕重謂盜跖等也。輕謂夷、齊、由、光等也。

「君子疾沒世而名不稱焉。」〔一〕賈子曰：〔二〕「貪夫徇財，〔三〕烈士徇名，夸者死權，〔四〕衆庶馮生。」〔五〕「同明相照，〔六〕同類相求。」〔七〕「雲從龍，風從虎，〔八〕聖人作而萬物覩。」〔九〕伯夷、叔齊雖賢，得夫子而名益彰。〔一〇〕顏淵雖篤學，附驥尾而行益顯。〔一二〕巖穴之士，趣舍有時若此，類名堙滅而不稱，悲夫！〔一三〕閭巷之人，欲砥行立名者，〔一四〕非附青雲之士，惡能施于後世哉？

〔一〕索隱自此已下，雖論伯夷得夫子而名彰，顏回附驥尾而行著，蓋亦欲微見己之著撰不已，亦是疾沒世而名不稱焉，故引賈子「貪夫徇財，烈士徇名」是也。又引「同明相照，同類相求」，「雲從龍，風從虎」者，言物各以類相求。故太史公言己亦是操行廉直而不用於代，卒陷非罪，與伯夷相類，故寄此而發論也。〔正義〕君子疾沒世後懼名堙滅而不稱，若夷、齊、顏回絜行立

名，後代稱述，亦太史公欲漸見己立名著述之美也。

〔二〕索隱 賈子，賈誼也。誼作鵬鳥賦云然，故太史公引之而稱「賈子」也。

〔三〕正義 徇，才迅反。徇，求也。瓚云：「以身從物曰徇。」

〔四〕索隱 言貪權勢以矜夸者，至死不休，故云「死權」也。

〔五〕索隱 馮者，恃也，音凭。言衆庶之情，蓋恃矜其生也。鄒誕本作「每生」。每者，冒也，即貪冒

之義。正義 太史公引賈子譬作史記，若貪夫徇財，烈士徇名〔四〕，夸者死權，衆庶馮生，乃

成其史記。

〔六〕索隱 已下並易繫辭文也。

〔七〕正義 天欲雨而柱礎潤，謂同德者相應。

〔八〕集解 王肅曰：「龍舉而景雲屬，虎嘯而谷風興。」張璠曰：「猶言龍從雲，虎從風也。」

〔九〕集解 馬融曰：「作，起也。」索隱 按：又引此句者，謂聖人起而居位，則萬物之情皆得覩見，

故己今日又得著書言世情之輕重也。正義 此有識也。聖人有養生之德，萬物有長育之情，

故相感應也。此以上至「同明相照」是周易乾象辭也。太史公引此等相感者，欲見述作之意，

令萬物有睹也。孔子歿後五百歲而已當之，故作史記，使萬物見觀之也。太史公序傳云：「先

人有言：『自周公卒五百歲而有孔子，孔子卒後至於今五百歲，有能紹明世（五），正易傳，繼春

秋，本詩、書、禮、樂之際？』意在斯乎！小子何敢讓焉。」作述六經云：「易著天地陰陽四時

五行，故長於變。禮經紀人倫，故長於行。書記先王之事，故長於政。詩記山川谿谷禽獸草木牝牡雌雄，故長於風。樂樂所以立，故長於和。春秋辨是非，故長於治人。是故禮以節人，樂以發和，書以道事，詩以達意，易以道化，春秋以道義。撥亂世反之正，莫近於春秋。」按：述作而萬物睹見。

〔一〇〕正義伯夷、叔齊雖有賢行，得夫子稱揚而名益彰著。萬物雖有生養之性，得太史公作述而世事益睹見。

〔一二〕索隱按：蒼蠅附驥尾而致千里，以譬顏回因孔子而名彰也。

〔一三〕正義趣音趨。舍音捨。趣，向也。捨，廢也。言隱處之士，時有附驥尾而名曉達；若堙滅不稱數者，亦可悲痛。

〔一三〕正義砥音旨。礪行脩德在鄉閭者，若不託貴大之士，何得封侯爵賞而名留後代？

【索隱述贊】天道平分，與善徒云。賢而餓死，盜且聚羣。吉凶倚伏，報施糾紛。子罕言命，得自前聞。嗟彼素士，不附青雲！

校勘記

〔二〕在隴西首「首」下疑脫「陽縣」二字。按：漢書卷七十二王吉傳顏師古注引曹大家注幽通賦

云首陽山在「隴西首陽縣」，通志卷一七七隱逸一引同。

〔三〕顏生 耿本、黃本、彭本、柯本、凌本、殿本、會注本作「顏子」。

〔三〕有忠臣 「有」上原有「始」字，據耿本、黃本、彭本、柯本、凌本、殿本刪。按：《老子》第十八章：

「六親不和，有孝慈。國家昏亂，有忠臣。」本書卷九〇魏豹彭越列傳「天下昏亂，忠臣乃見」索隱：「老子曰『國家昏亂，有忠臣』。」

〔四〕若貪夫徇財烈士徇名 「財烈士徇」四字原無。張文虎札記卷五：「疑所據本『貪夫』下原脫『徇財烈士』四字。」按：黃本眉批、彭本、殿本有此四字，與正文合。今據補。

〔五〕紹明世 「明」，原作「名」，據黃本、殿本改。按：本書卷一三〇太史公自序作「明」。

史記卷六十二

管晏列傳第二

管仲夷吾者，潁上人也。^{〔一〕}少時常與鮑叔牙游，鮑叔知其賢。管仲貧困，常欺鮑叔，^{〔二〕}鮑叔終善遇之，不以爲言。已而鮑叔事齊公子小白，管仲事公子糾。及小白立，爲桓公，公子糾死，管仲囚焉。鮑叔遂進管仲。^{〔三〕}管仲既用，任政於齊，^{〔四〕}齊桓公以霸，九合諸侯，一匡天下，管仲之謀也。

〔一〕索隱 潁，水名。地理志潁水出陽城。漢有潁陽、臨潁二縣，今亦有潁上縣。

正義 韋昭云：

「夷吾，姬姓之後，管嚴之子敬仲也。」

〔二〕索隱 呂氏春秋：「管仲與鮑叔同賈南陽，及分財利，而管仲嘗欺鮑叔，多自取。鮑叔知其有母而貧，不以爲貪也。」

〔三〕正義 齊世家云：「鮑叔牙曰：『君將治齊，則高傒與叔牙足矣。君且欲霸王，非管夷吾不可。」

夷吾所居國國重，不可失也。』於是桓公從之。」韋昭云：「鮑叔，齊大夫，姒姓之後，鮑叔之子叔牙也。」」

〔四〕正義管子云：「相齊以九惠之教，一曰老，二曰慈，三曰孤，四曰疾，五曰獨，六曰病，七曰通，八曰賑，九曰絕也。」」

管仲曰：「吾始困時，嘗與鮑叔賈，二分財利多自與，鮑叔不以我爲貪，知我貧也。吾嘗爲鮑叔謀事而更窮困，鮑叔不以我爲愚，知時有利不利也。吾嘗三仕三見逐於君，鮑叔不以我爲不肖，知我不遭時也。吾嘗三戰三走，鮑叔不以我爲怯，知我有老母也。公子糾敗，召忽死之，吾幽囚受辱，鮑叔不以我爲無恥，知我不羞小節而恥功名不顯于天下也。生我者父母，知我者鮑子也。」

〔一〕正義音古。

鮑叔既進管仲，以身下之。子孫世祿於齊，有封邑者十餘世，一二常爲名大夫。天下不多管仲之賢，而多鮑叔能知人也。

〔一〕索隱按：系本云「莊仲山產敬仲夷吾，夷吾產武子鳴，鳴產桓子啓方，啓方產成子孺，孺產莊子盧，盧產悼子其夷，其夷產襄子武，武產景子耐涉，耐涉產微，凡十代」。系譜同。

管仲既任政相齊，（一）以區區之齊在海濱，（二）通貨積財，富國彊兵，與俗同好惡。故其稱曰：（三）「倉廩實而知禮節，衣食足而知榮辱，上服度則六親固。」（四）四維不張，國乃滅亡。（五）下令如流水之原，令順民心。」故論卑而易行。（六）俗之所欲，因而予之；俗之所否，因而去之。

（一）正義國語云：「齊桓公使鮑叔爲相，辭曰：『臣之不若夷吾者五：寬和惠民（三），不若也；治國家不失其柄，不若也；忠惠可結於百姓（四），不若也；制禮義可法於四方，不若也；執枹鼓立於軍門，使百姓皆加勇，不若也。』」

（二）正義齊國東濱海也。

（三）索隱是夷吾著書所稱管子者，其書有此言，故略舉其要。

（四）正義上之服御物有制度，則六親堅固也。六親謂外祖父母一，父母二，姊妹三，妻兄弟之子四，從母之子五，女之子六也。王弼云「父、母、兄、弟、妻、子也」。

（五）集解管子曰：「四維，一曰禮，二曰義，三曰廉，四曰恥。」

（六）正義言爲政令卑下鮮少，而百姓易作行也。

其爲政也，善因禍而爲福，轉敗而爲功。貴輕重，（一）慎權衡。（二）桓公實怒少姬，（三）南襲蔡，管仲因而伐楚，責包茅不入貢於周室。桓公實北征山戎，而管仲因而令燕修召公